



# education

Department:  
Education  
North West Provincial Government  
**REPUBLIC OF SOUTH AFRICA**

## PROVINCIAL ASSESSMENT UVIWO LWEPHONDO

**IBANGA 11**

**ISIXHOSA ULWIMI LWASEKHAYA (HL)  
IPHEPHA LOKUQALA (P1)  
EYESILIMELA 2024**

**AMANQAKU: 70**

**IXESHA: 2 iiyure**

**Olu viwo lunamaphepha ali-13.**

**IMIYALELO NENGCACISO**

1. Eli phepha lemibuzo LINAMACANDELO AMATHATHU:  
ICANDELO A: Isicatshulwa (30)  
ICANDELO B: Ushwankathelo (10)  
ICANDELO C: Izakhi nemigaqo yokusetyenziswa kolwimi (30)
2. Funda YONKE imiyalelo ngocoselelo.
3. Phendula YONKE imibuzo.
4. Qala ICANDELO NGALINYE kwiphepha ELITSHA.
5. Krwela umgca ekupheleni KWECANDELO NGALINYE.
6. Nombola iimpendulo ngokuchanekileyo ngokwendlela ekunonjolwe ngayo kwiphepha lemibuzo.
7. Shiya umgca emva kwempendulo NGANYE.
8. Qwalasela ngokukodwa upelo nolwakhiwo lwezivakalisi.
9. lingcebiso malunga nolwabiwo lwexesha:  
ICANDELO A: Imizuzu engama-50  
ICANDELO B: Imizuzu engama-30  
ICANDELO C: Imizuzu engama-40
10. Bhala ngokucocekileyo nangokucacileyo.

**ICANDELO A: ISICATSHULWA****UMBULO 1: UKUFUNDELA INTSINGISELO NOKUQONDA**

Funda IZICATSHULWA A no B ezingezantsi uze uphendule imibuzo esekwe kuzo.

**ISICATSHULWA A****IIMFIHLELO ZABANTU ABAPHUMELELAYO**

- 1 Impumelelo ifuna ukuba uphakame ungalindeli ukuba uqhutywe okanye uqale ubetheke ukuze wenze izinto. Ubomi abuzenzekeli, nokuba uyayazi loo nto okanye akuyazi buqulunqwa nguwe ngobugcisa. Nguwe okhetha indlela omawubuqhube ngayo ubomi bakho.
- 2 Enye yeendlela zokuphumelela ebomini kukuthatha uxanduva. Abantu abaphumelelayo bakwenza oko ngokungasoli mntu, nazimeko okanye imfuzo ngokwenzeka ebomini babo. Indlela othetha ngayo isisipili sendlela ozibona ngayo. Umntu ozondelele impumelelo uviwa kwangochongo lwamagama awasebenzisayo; usebenzisa amagama afana no; 'Ndinakho', 'Ndinganakho', kunye no'Ndikhetha ...'. amagama afana no; 'Andinakho', noo'Ndingayenza ukuba ...'
- 3 Abantu abaphumelelayo bazidla ngokuba bona abazidubi ngezinto abangenalulawulo lwazo, koko bachitha ixesha namandla abo kwizinto abakwazi ukuzilawula kuphela. Eyona nto bakholelwa kuyo kukuba nefuthe kubantu. Benza izinto abakwazi ukuba nolawulo lwazo ukanti abantu abangaphumeleliyo bona bachithela ixesha labo kwizinto abangenalo ulawulo lwazo okanye abanolawulo olungephi kuzo kuze kube nzima ukuphumelela.
- 4 Kubantu abayaziyo into abayifunayo ebomini, enye yeemfihlelo kukwenza isicwangciso sobomi. Ukwenza isicwangciso sobomi kukuqala ngezinto zokuqala nokuzikhetha ngobuchule izinto emazeniwe. Izinto zokuqala zezo uzibona izezexabiso. Ukuqala ngezinto zokuqala kunceda ekuhlenga-hlengiseni nasekulawuleni ixesha neziganeko ngokweemfuno zakho. Kukwanceda ekongeni ixesha. Esi sicwangciso sikhulisa ukuzithemba sikwancedisa nasekuphumezeni iinjongo nemibono yakho. Siyakunceda ekuzilawuleni nasekufikeleleni kwiinjongo zakho. Kananjalo, ngeli xa wenza isicwangciso kufuneka uwazi amandla akho, ube no-hayi ukuze ungawoleli konke ude ungakwazi ukuhambelana nexesha. Isicwangciso sikwancedisa ekukhupheleni amandla kumba obalulekileyo kuwe.
- 5 Ukudlelana kwamaqela aze aneze iimfuno zawo omabini kukwayenye yeemfihlelo zempumelelo. Kona kuyindlela yokukwazi ukudlelana nokusebenzisana nabantu. Kukujonga ubomi njengentsebenziswano, hayi ukhuphiswano. Abanye babona impumelelo njengokhuphiswano apho kufuneka abanye abantu bangaphumeleli ukuze bona baphumelele. Bona abantu abaphumelelayo bakholelwa ukuba wonke umntu unesabelo sempumelelo eyahlukileyo kweyomnye. Ukuzamela ukwaneza iimfuno zomntu wonke kuqala engqondweni nasentliziyweni. Kukwathetha ukuba kwizivumelwano nezisombululo abantu abazithathayo bayaxhamla bonke.

- 6 Unxibelelwano sisakhono esingundoqo kwimfihlelo yempumelelo. Unxibelelwano olululo kukwenza le nto unga ingenziwa kuwe, ngoko ke, qala ngokuqonda abanye abantu phambi kokuba ufune ukuqondwa. Phambili kunxibelelwano kukho isakhono sokuphulaphula. Umntu ufunda iminyaka ukufunda, ukubhala nokuthetha kodwa kuncinci okwenziwayo ngokuphulaphula. **Ingaba lukho ulolongo olwenziwayo ukuqinisekisa ukuba ubani uyabaqonda nzulu abanye abantu?** Mhlawumbi alukho.
- 7 Uninzi lwabantu luxhinela ukuqondwa lungathathanga nxaxheba kwaphela. Lukwenza oko ngokungayihoyi kwaphela into ethethwa ngomnye umntu, lwenze ngathi lumamele, lukhethe iindawana kwintetho yesithethi kungenjalo umntu athi emamele ibe ingqondo ithatha ibeka iqulunqa impendulo okanye imibuzo aza kuyibuza. Umntu endaweni yokuhluzisa akuvayo usebenzisa amava obomi bakhe kuphela aphenyule ecaleni. Ekugqibeleni ukhawuleza agwebe ukuba sithetha ukuthini isithethi phambi kokuba abe umamele, weva okuthethwayo. Akho amaxesha apho amava omntu aye afuneka. Oku kwenzeka xa umntu lowo ecelwe ukuba anike uluvo lwakhe ngomba othile nangona oko kufuna ukuthembana okukwiqondo eliphezulu kwesi sibini.
- 8 Intsebenziswano nokwamkela iibono zabanye abantu ziimfihlelo zempumelelo ebomini. Imbumba yamanyama ineziphumo ezingcono. Ubambiswano ngamandla luphumeza iinjongo ebezingenakuphunyezwa ngumntu omnye. Iibono ezahlukeneyo ziphuhlisa izisombululo ezitsha. Kukho impazamo yokucinga ukuba xa abantu befana loo nto ithetha bamanyene okanye ithetha ubunye. Ukanti abantu bayakwazi ukumanyana bohluke ngezimvo. Ukwahluka ngezimvo makujongwe njengophawu lwamandla hayi uphawu lobuthathaka. Ukwahluka sisinongo sobomi.
- 9 Esona sixhobo sokuya empumelelweni nguwe buqu. Ufana nqwa nekrele. Ikrele ke liyalolwa libe lubengu. Kumele uzilole ngokusoloko uzihlaziya ngokwasemzimbeni, ngokwasentlalweni, ngokwasengqondweni, emphefumleni nangokwasemoyeni. Ungakwenzanga oko, umzimba uphela udinwa, ingqondo ingasebenzi ngendlela, uswele uvelwano, umoya ungabi nabuntunu-ntunu kwabanye, ube ngumntu ozicingela yedwa.
- 10 Uphando luveza ukuba uninzi lwabantu aluphili ubomi obuphuhlileyo, alonwabanga, kwaye alwanelisekanga, ngoko ke kufuneka utshintsho kwindlela yokwenza izinto, olujolise ekusebenziseni iimfihlelo zabantu abaphumeleleyo, utshintsho oluxhinele 'ukuphuhlisa ngamandla ukugqibelela, ukunikela eluntwini kunye nokuba lulutho kwisizwe siphela.

[Sicatshulwe kwi-intanethi; <https://www.pdfdrive.net/html> saguqulelwa esiXhoseni, saze sahlalelwa]

**ISICATSHULWA B**

[ucatshulwe kwi-intanethi-images.com]

**JONGA KUMHLATHI WOKU-1**

- 1.1 Xela ekufuneka umntu akwenze ukuze aphumelele (1)
- 1.2 Chaza injongo yokuphindaphindwa kuka 'nguwe'. (2)

**JONGA KUMHLATHI WESI-2**

- 1.3 Caphula isivakalisi esiqulethe intsingiselo yokuba abantu abaphumelelayo ngabaluthathela kubo uxanduva lobomi babo (1)
- 1.4 Xela injongo yokusetyenziswa komntu wokuqala kwintetho elandelayo. (2)  
Ndinakho', 'Ndinganakho', kunye no'Ndikhetha' ...

**JONGA KUMHLATHI WESI-3.**

- 1.5 Chaza umahluko phakathi kwabantu abaphumelelayo nabangaphumeleliyo ngokwendlela yokuchitha ixesha labo. (2)

**JONGA KUMHLATHI WESI-4.**

- 1.6 Kukuthini ukwenza isicwangciso sobomi? (1)
- 1.7 Sinika intsingiselo ni isakhi u-zi kwigama 'ekuzilawuleni'? (1)

## JONGA KUMHLATHI WESI-5.

1.8 Khetha impendulo echanekileyo kwezi zilandelayo. (1)

Nika ingcamango ephambili yomhlathi wesi-5.

- A Intsebenziswano endaweni yokhuphiswano.
- B Uvelwano endaweni yokhuphiswano.
- C Abanye mabangaphumeleli bona baphumelele
- D Impumelelo kukwaneliseka kukhuphiswano.

## JONGA KUMHLATHI WESI-6.

1.9 Xela injongo yokusetyenziswa kombuzo buciko kumgca obhalwe ngqindilili. (2)

## JONGA KUMHLATHI WESI-7.

1.10 Nika intsingiselo eziswa ligama elikrwelelwe umgca ngaphantsi kwisicatshulwa. (2)

1.11 Chonga igama elithetha into enye no-'ekupheleni'. (1)

## JONGA KUMHLATHI WESI-8.

1.12 LULUVO okanye YINYANI okukwisivakalisi esikrwelelwe umgca ngaphantsi? Xhasa impendulo yakho. (2)

## JONGA KUMHLATHI WESI-9.

1.13 Nika iindlela EZIMBINI zokuzihlaziya ezinokwenza ukuba uhlale ulolekile ngokwakwisicatshulwa. (2)

## JONGA KUMHLATHI WE-10.

1.14 Uyangqinelana nokuvezwa luphando oluthi 'uninzi lwabantu aluphili ubomi obuphuhlileyo, alonwabanga, kwaye alwanelisekanga'? Xhasa impendulo yakho. (2)

## JONGA KWITEKISI YONKE.

1.15 Ucinga ukuba esi sicutshulwa sinako ukutshintsha iingqondo zabantu ngendima abayidlalayo kwimpumelelo yabo? Xhasa impendulo yakho. (2)

**AMANQAKU ECANDELO A : 30**

**ISICATSHULWA B**

- 1.16 Chuba umohluko ophawulekayo kwizenzo zabantu abakwezi zakhelo zibini (2)

**ISICATSHULWA A noB**

- 1.17 Caphula umqolo kumhlathi wesi-8 odlulisa umyalezo ofanayo nomyalezo odluliswa sisenzo sabantu abakwisakhelo soku-1 (2)
- 1.18 Ingaba isicatshulwa B siyaluxhasa uluvo lombhali olukumhlathi wesi-5 kwisicatshulwa A? Xhasa impendulo yakho. (2)

**[30]**

**ICANDELO B : USHWANKATHELO**

**UMBUZO 2 : UKUSHWANKATHELA**

Funda ngocoselelo ISICATSHULWA C esingezantsi esithetha ngokuthetha.  
Shwankathela ngokugqala ulwazi **olungundoqo** ngenkcazelo emalunga nokuthetha.

**QAPHELA:** Kulindeleke ukuba wenze oku kulandelayo:

- Shwankathela ngoMHLATHI usebenzisa awakho amazwi kangangoko unako.
- Impendulo yakho mayiquke iingongoma ezisixhenxe ingadluli kumagama angama-70.
- **Akulindelekanga** ukuba ubhale isihloko sesishwankathelo.
- Qaphela indlela echanekileyo yokusetyenziswa kolwimi, iimpawu zobhalo nococeko.
- Bhala phantsi inani lamagama owasebenzisileyo wakugqiba.

### ISICATSHULWA C

#### UKUTHETHA

Ukuthetha sesinye seziphondo zendalo ezanikwa izidalwa ukuze zibe nakho ukudlulisela oko zikucingayo, zikugqithisela kwezinye izidalwa ngokohlobo lwazo. Sicinga ukuba abantu zezona zidalwa zikuphiwe ngokukhulu ukwazi nokuva nokuqonda intetho. Sisitsho nje phofu, sitsho kuba singazazi iintetho zezinye izidalwa.

Kwezasekhaya izidalwa ezihlala nomntu imihla ngemihla, umntu ude abe nokucaphula intwana entethweni yazo, nazo zicaphule intwana kweyakhe intetho. Ngohlobo etsho ngalo inkomo ukuthi, 'Mho!' uyaqonda umntu ukuba yinkunzi yenkomo iqephula iziduli, isiphula izicithi, icela uphondo. Uyazi ukuba yimazi ifuna ithole layo, okanye ithole lifuna unina. Uyazi ukuba yinkomo ixelela ezinye ukuba kukho inkomo efele kuloo ndawo.

Ubunzima bokuyiqonda intetho bukho naphakathi komntu nomnye umntu xa abo bantu bahlukene ngobuhlanga. Kungenxa yobu bunzima le nto kukho izikolo ekuthi phakathi kwezinto ezifundiswayo kufundwe iilwimi ngeelwimi, luze luthi olo lwimi luthelwasamela, ngenxa yorhwebo nangokusasazwa kolwazi, lufundwe ngumntu wonke njengesingesiNgesi kule mihla.

Ukuthetha kumnandi, ukuthetha kubi. Kumnandi ukuthetha kwabantu abathandanayo, abahleli beyilumkele into yokuba makungaphumi lizwi lenzakalisa omnye, ekuthi nokuba omnye lithe lamphuluka abuye ayibuyekeze loo mpazamo ngokucela uxolo. Kaloku ilizwi elirhabaxa livusa umnye, kanti ilizwi elithambileyo lilalisa uboya. Kubi ukuthetha okunyhukulayo, ongafika abantu behleli ngathi yikati nenja, kungekho luxolo phakathi kwabo.

Kumnandi ukuthetha kwendoda emxhelo wophukileyo ngokonakala kwezinto zakowayo. Wofika icikoza ithetha kwiingqungquthela ngeengqungquthela ibonisa izinto emaziyekwe ukwenziwa kuba zinxamnye nezithethe kwanokusesikweni. Wofika ifundisa ngezinto zokuphakamisa uhlanga nokuphumelelisa intlalo-ntle phakathi kwabantu.



Kubi ukuthetha komntu ohlebayo obadla izithende abanye abantu, kuthi kuba umlomo awubekwa siziba, loo ntlebendwane ibuye ize kufika ezindlebeni zalowo ubehlelywa, ibe yingxabano nentiyano phakathi kwakhe nomhlebi.


Kumnandi ukuthetha kwembongi, ethi kuba yona inelungelo lobumbongi, ibacubhule abantu ngokuthetha izinto ezi zingathethwayo. Kwayona le mbongi iyakwazi ukuthetha izinto ezichukumisayo, ezitsho igazi lihlobe, abantu baziphathe ngeenkophe iinyembezi.

[Sicatshulwe kwincwadi ethi *AMAVO AMAFUTSHANE* ebhalwe ngu A Madala sahlelwa]

**AMANQAKU ECANDELO B: 10** [10]

**ICANDELO C: IZAKHI NEMIGAQO YOKUSETYENZISWA KOLWIMI****UMBUZO 3: UKUHLALUTYA INTENGISO**

Funda le ntengiso ingezantsi (ISICATSHULWA D) uze uphendule imibuzo esekwe kuyo.

**ISICATSHULWA D**

[Sicatshulwe kwi-intanethi [www.googlesearch.com](http://www.googlesearch.com), saguqulelwa saze sahlelwa]


- 3.1 Xela umsebenzi wale mveliso ikule ntengiso. (1)
- 3.2 Ijoliswe koobani le ntengiso? (2)
- 3.3 Yintoni injongo yokusebenzisa ifonti enkulu xa kubhalwa igama lale mveliso? (2)
- 3.4 Ingaba igama 'ESEMPILWENI' liyahambelana nomfanekiso wenenekazi elikule ntengiso? Xhasa impendulo yakho. (2)
- 3.5 Khetha impendulo engangqinelaniyo ngomxholo kwezingezantsi. (1)
- I-Colgate ....: -
- A Ilwa iintsholongwane
- B Igcina amazinyo esempilweni
- C Igcina iintsini zisempilweni
- D Ikwenza ube mhle
- 3.6 Ngcinga ni ebethelwa kukusetyenziswa komfanekiso wenenekazi elibukekayo apha kulo mfanekiso. (2)

**[10]**

**UMBUZO 4: IKHATHUNI**

Funda le khathuni (ISICATSHULWA E) ingezantsi uze uphendule imibuzo esekwe kuyo.

**ISICATSHULWA E**



[Icatshulwe kwi-intanethi-[www.zitscartoons.com](http://www.zitscartoons.com)]

- 4.1 Veza ingcinga eziswa sisakhi u'si' osetyenziswe nguVuyo kwisakhelo soku-1. (2)
- 4.2 Khetha impendulo echanekileyo kwezi zingezantsi:  
Nika intsingiselo yentetho kaMama ethi 'Ndiziindlebe ndonke'.  
A Ndiyeza  
B Ndiqumbile  
C Ndiphulaphule  
D Ndikujongile (1)
- 4.3 Nika umsebenzi wamachaphaza amathathu akwisakhelo sesi-2. (1)
- 4.4 Ngqina ngesizathu esinye ukuba ifoni ikhalela phezulu ngokwesakhelo sesi-3. (1)
- 4.5 Xela indlela umzobi akubonise ngayo ukubaxeka kwesenzo sokucofa kukaVuyo ifowuni kwisakhelo sesi-4. (1)
- 4.6 Nika iindlela EZIMBINI okuvezwa ngazo ukumangala kukaMama kwisakhelo sesi-5. (2)
- 4.7 Nika ingcebiso ngendlela esemthethweni yokusombulula le ngxaki akuyo umama kwisakhelo sesi-6. (2)

**[10]**

**UMBUZO 5: IPROZI**

Funda esi sicutshulwa (ISICATSHULWA F), singezantsi uze uphendule imibuzo esekwe kuso.

**ISICATSHULWA F****ISAZELA**

Isazela lilizwi elivakala bunkente-nkente emntwini limnganda ukuba angangeni kwimikhwa nemikhuba ekhohlakeleyo. Umntu ngamnye ukhula enesazela esimxelelayo ngalo lonke ixesha into elungileyo kanti nento engamkelekanga eluntwini. Isazela asifani nondlebende ongenasali inkwenkwe etywula ithi cwaa kuye ize itsibe yakuthanda ingenzanga nelimdaka ilizwi lombulelo. Isazela yinkosi yomntu yaye abantu bengabantu nje kungenxa yokuzingisa ukululamela ngobulali nangokuzeleyo izazela zabo. Ungamva umntu xa ecengwa ukuba angene kwinto engavumelaniyo negazi lakhe esithi, 'Isazela sam asindivumeli ukuba ndiyenze into enjalo'. Umntu owalelwa sisazela sakhe ukuba angayenzi into ethile loo mntu uyaphila. Umntu osabelayo akubizwa lilizwi elingaphakathi kuye ngumntu loo nto.

Bakhona abo abazikhohlisa ngelithi izazela zabo zilawulwa ngabo. Umntu akusilawula isazela sakhe uyenzakala. Isazela asiyodyasi yemvula umntu ayikhumbula lakuhlom'izulu, koko isazela yinto ekufuneka umntu esoloko ephantsi kweempembelelo zayo.

Umntu ngamnye uzalwa enesazela esiye sikhula nokukhula kwakhe. Iyenzeka into yokuba njengokuba umntu eya ekhula nje angasithobeli isazela sakhe. Uyakwazi umntu ukuya ekhula kanti sona isazela sakhe siye sidodobala

[Sithathwe kwincwadi ethi, *KUNGAQHUMA KUBASIWE* ebhalwe ngu: LL Ngewu: amaphepha 1-2, saze sahlelwa.]

- 5.1 Nika isichasi sesenzi esikrwelelwe umgca ngaphantsi kwesi sivakalisi silandelayo.  
Isazela lilizwi elivakala bunkente-nkente emntwini limnganda ukuba angangeni kwimikhwa nemikhuba ekhohlakeleyo. (1)
- 5.2 Xela umsebenzi wesimelabizo esibhalwe ngqindilili kwisivakalisi esilandelayo.  
Umntu ngamnye ukhula enesazela esimxelelayo ngalo **lonke** ixesha into elungileyo. (1)
- 5.3 Bhala imo evumayo yesenzi esikrwelelwe umgca ngaphantsi.  
Isazela asifani nondlebende ongenasali. (1)
- 5.4 Senze msebenzi mni isibizo esikrwelelwe umgca ngaphantsi?  
Ungamva umntu xa ecengwa ukuba angene kwinto engavumelaniyo negazi lakhe esithi, ... (1)
- 5.5 Guqula le ntetho-ngqo ilandelayo ibe kwimo yengxelo-ntetho.  
Ungamva umntu esithi: 'Isazela sam asindivumeli ukuba ndiyenze into enjalo.' (2)
- 5.6 Nika umsebenzi wesimnini esikrwelelwe umgca ngaphantsi kwisivakalisi esilandelayo.  
Umntu owalelwa sisazela sakhe ukuba angayenzi into ethile loo mntu uyaphila. (1)
- 5.7 Nika intsingiselo yebinzana elikrwelelwe umgca ngaphantsi ngokwakwiscatshulwa.  
Isazela asiyodyasi yemvula yona umntu ayikhumbula lakuhlom'izulu, ... (1)
- 5.8 Xela okuphuhliswa sisimamva sesixando esikrwelelwe umgca ngaphantsi.  
Umntu ngamnye uzalwa enesazela esiye sikhula nokukhula kwakhe. (2)

[10]

**AMANQAKU ECANDELO C: 30****AMANQAKU EWONKE: 70**